

UMS lancar Tabung Ehsan Alumni

UB 15.6.2018 A8

KOTAKINABALU: Universiti Malaysia Sabah (UMS) melancarkan Tabung Ehsan RM1/3/5 Alumni UMS pada Majlis Iftar bersama alumni di sebuah hotel, di sini.

Pelancaran tabung berkenaan disempurnakan Ahli Lembaga Pengarah UMS merangkap Penaung Alumni UMS Datin Hajah Nurlaila Hj Said.

“Tabung Ehsan ini bertujuan mengutip sumbangan dari kalangan alumni serendah RM1, RM3 atau RM5 setiap bulan untuk mengumpul dana bagi membantu mana-mana alumni UMS di seluruh negara yang menghadapi kesulitan atau kecemasan.

“Tabung ini banyak manfaat kepada kalangan alumni UMS sendiri ibarat kata pepatah ‘berat sama di pikul, ringan

sama dijinjing’,” katanya ketika berucap melancarkan tabung berkenaan.

Nurlaila yang juga alumni UMS turut menyeru semua alumni untuk menyumbang sama ada setiap bulan atau setahun sekali.

Dalam pada itu, Timbalan Naib Canselor Hal Ehwal Pelajar dan Alumni (HEPA) Prof Dr Ismail Ali dalam ucapannya meminta Kelab Alumni Fakulti UMS atau Pertubuhan Alumni UMS lebih aktif untuk mengadakan majlis sedemikian dan acara lain yang berakaitan bagi memastikan slogan ‘stay connected’ alumni UMS dengan alma mater dapat diterjemahkan.

“Program pada kali ini adalah sebahagian aktiviti yang dianjurkan oleh Pusat



PELANCARAN Tabung Ehsan Alumni oleh Nurlaila (dua kiri) sambil diperhatikan Ismail (kiri) dan Darwis (kanan).

Alumni UMS dan besarlah harapan pihak penganjur agar program seumpama ini dapat dilaksanakan oleh Pertubuhan Alumni UMS pada masa akan datang.

“Sesungguhnya, program-program yang dianjurkan oleh Pusat Alumni UMS sentiasa memberi manfaat dan kebaikan kepada alumni dan masyarakat serta dapat memupuk semangat perpaduan dalam diri kita,” katanya.

Dalam masa yang sama katanya, para alumni juga dapat menjalin kerjasama serta berkongsi kepakaran dan kemahiran sesama mereka.

Majlis Iftar dan Pelancaran Tabung Ehsan itu mendapat sambutan yang memberangsangkan dengan kehadiran seramai 180 alumni UMS.

Hadir sama, Pengarah Pusat Alumni UMS Darwis Hj Awang, Pengerusi Majlis Timbalan Dekan HEPA UMS Dr Mohamad Puad Bebit dan Ketua Chapter Alumni UMS Pantai Barat Sabah Dg Maimunah Hj Sidek.



ALUMNI UMS yang hadir menderma Tabung Ehsan Alumni.